



Fundasaun Mahein (FM), 29 Juñu 2018

Komunikadu Imprensa

Ameasa no Risku Terrorismu ba Timor-Leste

Timor-Leste nasaun kiik no lao's autor ka kolegasaun ba jogu "funu global kontra terrorismu", nune'e mos hakotu iha nia polítika rasik atu hadook-an husi problema ida ne'e. Maske faktu nune'e, Fundasaun Mahein (FM) fiar katak iha eventu daudaun ne'ebé akontesementu barak maka sai polítika ida ne'ebé diak liu ba Timor-Leste tenke aseita asuntu terrorismu global ho rasional hodi halo diskusaun ba tentativa implikasaun ba seguransa nasional.

Portantu Timor-Leste hanesan Nasaun ida ne'ebé hale'u ho nasaun sira iha rejiaun ho nivel ameasa atake terrorista kritiku tebes. Partikularmente Indonézia no Australia nia fronteira ho Timor-Leste iha rai maran, tasi no aero. Nune'e mos Indonézia no Australia hanesan fonte ba movimentu ema no komersiu liga Timor-Leste ho Nasaun seluk tantu husi rai maran, tasi no aero. Australia no Indonézia hanesan mos fatin transit ba movimentu aero nian mai Timor-Leste. Ida ne'e fó alerta katak Timor-Leste tenke diskute asuntu terrorismu no hametin kooperasaun sira seguransa nian hodi hetan informasaun sira atual iha kontektu ameasa terrorista nian.

Iha âmbito seluk, relatóriu avaliasaun husi organizasaun internasional, instituisaun Estadu sira husi rai liur no avalisaun husi rai laran konklui katak Timor-Leste iha zona verde. Signifika katak Timor-Leste la iha insidente ka impaktu ruma husi terrorismu. Maibe identifika iha vulnerabilidade iha âmbito brankamentu kapital hanesan ameasa relevante ba finansiamentu ba terrorismu. Tamba institusaun finanseiru sira seidauk kumpri lolos sira nia obrigasaun tuir Lei Kombate Brankamentu Kapital no Finansiamentu Terrorismu nian.

Esforsu Timor-Leste halo kona-bá kombate terrorista ka hasoru ameasa terrorismu liu husi servisu sira seguransa nian hanesan Polísia Nasional Timor-Leste (PNTL) kontinua vijilante no monitorizasaun iha area kritiku sira hanesan fronteira. Nune'e mos estabelese mekanismu kooperasaun ho autoridade seguransa Indonézia nian hodi fahe informasaun no prevene terrorista tama iha Timor-Leste. Esforsu seluk kona-bá kombate finansiamentu terrorismu liu husi Banco Central Timor-Leste (BCTL) regularmente serkula ona lista ba institusaun finanseiru sira hodi hala'o tuir Lei Kombate ba Brankamentu Kapital no Finansiamentu Terrorismu.

Esforsu sira nune'e Timor-Leste tenke kontinua fortifika no asuntu terrorismu nafatin diskute hodi bele aktualiza no ho planeamentu kombate terrorismu ida abrajente iha servisu integradu setor seguransa nian.

Rekomendasaun

1. Timor-Leste tenke vijilante no avaliasaun bebeik ba risku no ameasa sira husi terrorismu nian. Portantu atake terrorista bele akontese iha kualker tempu.
2. Timor-Leste presiza lei espesifiku ida hodi define lolos kona-bá terrorismu.
3. Autoridade relavante sira presiza fortifika implementasaun Lei Kombate Brankamentu Kapital no Finansiamentu Terrorismu nian nune'e institusaun finanseiru sira ne'ebé opera iha Timor-Leste tenke kumpri sira nia obrigasaun tuir lei ne'e nia haruka.

Atu hetan informasaun kle'an liu kona-bá asuntu ne'e bele kontaktu:

Nélson Belo

Diretor Ezekutivu

Email: direktor.mahein@gmail.com

Telemovel: (+670) 78316075 ka 77561184

Website: www.fundasaunmahein.org